

**Antifone di jentrade cf. Sal 85,1-3**

**S**lungje la tô orele, Signôr, e rispuindimi:  
gno Diu, salve il to famei che in te al spere;  
ve dûl di me, Signôr,  
ch'o ai berlât viers di te dute la zornade.

**Colete**

Diu, che tu unissis tun sôl volê i cûrs dai tiei fedêi,  
daur ai tiei popui di volê ben a ce che tu comandis  
e di bramâ ce che tu desideris  
par che, framieç dai savoltaments di chest mont,  
i nestrîs cûrs a sedin pontâts là ch'e je la vere gjonde.  
Pal nestri Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

**PRIME LETURE Gs 24,1-2.15-17.18**

**O starin cul Signôr, parcè che al è lui il nestri Diu.**

Dal libri di Gjosuè

In chei dîs, Gjosuè al clamà a Sichem dutis lis tribûs di Israel; po al clamà dongje ducj i anzians di Israel, i siei socestants, i siei judiçs e i siei scrituriscj, che si meterin presince di Diu. Alore Gjosuè i disè a dut il popul: «Il Signôr, Diu di Israel, al dîs cussì: Par vieri i vuestris vons, come Terac, pari di Abram e di Nacor, a jerin a stâ di là dal flum e a levin daûr di altris dius. Se però no us va di stâ sot dal Signôr, sielzêt daurman cui ch'o volês servî: se i dius ch'a levin daûr i vuestris vons di là dal flum o ben i dius dai amoreos ch'o sês a stâ cumò te lôr tiere. Par chel che mi rivuarde me e la mê int, nô o starin cul Signôr!».

Il popul al rispuindè: «Nancje insumiâsi di butâ di bande il Signôr par stâ sot di altris dius! Il Signôr nestri Diu al è chel che nus à fats vignî sù, nô e i nestrîs vons, de tiere dal Egjit, de cjase ch'o jerin sotans, ch'al à fat robonis sot dai nestrîs vôi e nus à parâts dilunc fûr te strade ch'o vin fate e framieç di dutis lis tribûs ch'o vin passât jenfri. E il Signôr al à fat cori denant di nô ducj i popui e ancje i amoreos ch'a jerin a stâ culi. Ancje nô o starin cul Signôr, parcè che al è lui il nestri Diu!».  
Peraule di Diu.

**SALM RESPONSORIÂL dal Salm 33**

**R.** Il Signôr al è dongje di chei che lu servissin.

O vœi benedî il Signôr cence polse,  
la sô laut simpri su la mê bocje.  
La mê vite tal Signôr si glorie,  
che lu sepin i puars e s'indalegrin. R.

I vôi dal Signôr a son dome pe int juste  
e lis sôs orelis pai lôr berlis cuant che lu clamin.  
Il Signôr al ten di voli chei ch'a fasin robatis,  
par scancelâ ancje il lôr ricuart di cheste tiere. R.

I juscj a an berlât e il Signôr ju à sintûts  
e ju à deliberâts di ogni berdei.  
Se un al à il cûr displasint il Signôr i sta dongje,  
se al à il cûr pintût lu salve. R.

Lis disgraciis dal just a son tantis,

ma il Signôr lu delibere di dutis.  
Ducj i siei vues lui ju vuarde,  
in mût che nancje un no si crevi. R.

Il trist al è fat fûr de sô tristerie;  
chei ch'a odein il just a an di purgâlis.  
Il Signôr al salve la vite dai siei fameis;  
chei che si parin li di lui no varan cjastic di sorte. R.

### SECONDE LETURE Ef 5,21-32

**Chest misteri al è grant: lu dîs sul cont di Crist e de glesie.**

De letare di san Pauli apuestul ai Efesins

Fradis, stait sotponûts un a chel altri tal timôr di Crist.

Lis feminis ch'a sedin sotponudis ai lôr oms come al Signôr, parcè che l'om al è cjâf de femine, come che ancje il Crist al è cjâf de glesie, lui ch'al è il salvadôr dal so cuarp. E come che la Glesie e je sotponude a Crist, cussì ancje lis feminis a an di jessi sotponudis ai lôr oms in dut.

Oms, volêt ben a lis vuestris feminis come che Crist i à volût ben a la Glesie e si è ufiert par jê par fâle sante, smondeante cu la purificazion da l'aghe compagnade de peraule, e par vê dongje di se cheste Glesie, sflandorose, cence magle o grispe o alc altri dal gjenar, ma sante e immacolade. Cussì ancje i oms a an di volêur ben a lis lôr feminis, come ai lôr cuarps. Chel che i vûl ben a la sô femine si vûl ben a se: di fat nissun nol à mai odeade la sô stesse cjar; che anzit le nudrîs e le trate cun cure, come ch'al fâs ancje Crist cu la sô Glesie, parcè che o sin parts dal so cuarp. Par chel l'om al bandonarà so pari e sô mari e si tirarà dongje de sô femine e i doi a diventaran une cjar sole. Chest misteri al è grant: lu dîs sul cont di Crist e de glesie.

Peraule di Diu.

### CJANT AL VANZELI Zn 6,63.68

**R. Aleluia, aleluia.**

Lis tôs peraulis, Signôr, a son spirt e vite.

Dome tu tu âs peraulis di vite eterne.

**R. Aleluia.**

### VANZELI Zn 6,60-69

**Di cui varessino di lâ? Dome tu tu âs peraulis di vite eterne.**

Dal vanzeli seont Zuan

In chê volte, dopo di vê sintût cussì, une vore dai siei dissepui i diserin: «Chest discors al è dûr. Cui rivial a parâlu jù?». Gjesù, savint dentri di se che i siei dissepui a bruntulavin a rivuart di chest discors, ur disè: «Chest us scandulizial? E cuant che o viodarês il Fi dal om a lâ sù là ch'al jere prime? Al è il Spirt chel ch'al fâs vivi, la cjar no zove a nuie. Lis peraulis che us ai ditis a son spirt e a son vite. Ma and è cualchidun fra di vualtris che nol crôt». Di fat Gjesù al saveve ancjemò di biel principi cui ch'a jerin chei che no crodevin e chel che lu varès tradît. E al diseve: «Par chest us ai dît: Nissun nol pò vignî di me se no i è dât dal Pari».

D'in chel moment une vore dai siei dissepui si tirarin indaûr e no levin plui cun lui. Alore Gjesù ur disè ai Dodis: «Volêso lâsint ancje vualtris?». I rispuindè Simon Pieri: «Signôr, di cui varessino di lâ? Dome tu tu âs peraulis di vite eterne, e nô o vin crodût e o vin ricognossût che tu tu sês il Sant di Diu».

Peraule dal Signôr.

### Su lis ufiertis

Signôr, che cuntune sole vitime,  
ufierte une volte sole,  
tu ti sês cuistât un popul di fîs,

danus, inte tô Glesie, la gracie de unitât e de pâs.  
Par Crist nestri Signôr.

**Antifone a la comunion cf. Sal 103,13-15**

Cul prodot des tôs voris tu passis la tiere, Signôr,  
par tirâ fûr il pan de tiere e il vin ch'al indalegri il cûr dal om.

**O ben: Zn 6,54**

Chel ch'al mangje la mê cjar e al bêf il gno sanc  
al à la vite eterne, al dîs il Signôr,  
e jo lu resussitarai te ultime dì.

**Daspò de comunion**

La midisine dal to boncûr, Signôr,  
ch'e operi adimplen dentri di nô  
e judinus e refinissinus  
in mût di fâti content in ogni nestre vore.  
Par Crist nestri Signôr.